

Edizioni

- letto 448 volte

Wallensköld

I.

Por froidure ne por yver felon
ne lesseraï
que ne face d'amors une chanson,
et si dirai
que qui aime repente s'en, s'il puet.
Chascuns le dit, mès mentir l'en estuet
qui bien aime, il ne s'en puet partir,
tant que l'ame li soit du cors partie.

II.

Por moi le di, que je ai mis a reson:
a moi tençai.
plus pren conseil de si fete acheson,
plus m'en esmai,
que li esmais de mon fin penser muet.
plus pens a li, et plus en i apluet.
dame, merci! je ne vos puis faillir;
ançois sera mers por pluie faillie.

III.

Dame, se j'ai de mes granz maus poor,
ne vous poist pas,
que bien poëz alegier ma dolor.
Et tu, t'en vas,
chanson, a li, si li di en plorant
qu'une merciz d'amors en souspirant
vaut bien cent tanz a fin, loial ami
que ne porroit pour riens cuidier s'amie.

IV.

Fort sont li laz et grant li couvertor
- ce n'est pas gas -
en que cil est qui aime par amor.
Et qu'en diras,
puis que je sai et conois son senblant

et je me tieng ensi devers sa gent?
M'a ele donc pris, lié ne saisi?
Oïl, certes, ja n'en ert dessaisie.

V.

Puis qu'ensi est, j'atendrai bonement
en lonc espoir,
car il n'est riens que je vousisse tant
con son vouloir
faire par tout sanz acheson trouver,
et el seüst mon cuer et mon penser;
que par ce cuit que j'avroie merci.
Deus, quant verrai pour quoi je la mercie!

VI.

Nus ne porroit de cestui mal esmer
fors vos, dame, combien il puet durer;
et, s'il vous plest, nel metez en oubli,
que nule foiz mes cuers ne vous oublie.

- letto 395 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-447>